

MEULEUDI AR C'HI.



War don gwers *Fualdès*.

Ar c'hi e penn ann holl loened
En deuz ato baleet,
Aliez eo bet hanvet
Roue ann holl anevaled :
Oc'h-penn kant ac'hanomp-ni
N'ho deuz ket spered ar c'hi.

Gwechall pa oa ar Rouaned
Labourerien douar,
Ho flijadur hag ho gloar
A glaskent o vesa denved;
Da vevel braz enn ho zi
E kemerent eur mell-ki.

Ar mevel braz enn hon amzer
E tiez ar rouaned,
En deuz, gwir eo, kalz spered ;
Lealded eo a c'houlenner :
Poan vraz em be ho kredi
E ve kel leal ha ki.

Ar c'hi a ra meur a vicher
Dre garantez 'vit ann den :

Beilla a ra d'he zifenn,
Hen heul a ra peb amzer;
'Liez hor bugale-ni
N'hor c'haront ket koulz ha ki.

Pa welann , e wel he lagad;
Pa c'hoarzann , e fich he lost;
Pa'm euz aon e choum a dost;
Pa'z ann da vale ec'h ebad;
Da glasz eunn dra a-zevri
Piou a zo ker koulz ha ki ?

Enn deiz all Jann ar Riboter
A choumaz gand he govad,
Hed he gorf enn eur stread ,
Tro-war-dro Jann geaz a glasker ;
Azor araok pep-hini
Her c'havaz gant bek he fri.

War he veno , Fanch Burzudo
A zo eunn tenner dispar ,
Beb tenn-fuzul e tiskar
Eur gwenneli : Piou her c'hredo ?
Mar tebr gedon , klujiri,
E lavar bennoz d'he gi.

Eunn demezel euz ar vrava
Skubet gant ann avel foll ,
Enn deiz all a ie da goll
Ebarz e ster Lokmaria :
Fox a bakaz anez-hi :
Piou a neun evel ar c'hi ?

Pipi Mondian a Dreger
A ie etrezek Paris ,
Aour gant-han enn he c'houriz ,
War ann hent-braz e kav eul laer :
His! Pill! *Turk* , e-me, Bipi ,
Ialc'h , buez a dle d'he gi.

Eunn nozvez e oamp holl kousket
Pa glaskaz Jann Lasener
Digeri prenest va c'her ;
Prestig e oue dialbennet :
Chilp , a-ziabarz ann ti ,
A grogaz e bek he fri.

Eur c'hi mad a zo e-pek bro
Gwel eget kalz mignoned ,
Pa'z eomp da glask hor boed ,
Ar re man a ia enn ho zro ,
Ha na weler neuze mui
Nemet sant Rok hag he gi.

Eunn tad, eur vamm a zaelaoue
O c'hortoz ho bugel ker ,
A oa eet emeaz ar ger
Da glask he vad hervez Doue :
Tavit , Tobi , e ma tost
Erru he gi *Fich-he-Lost*.

Ann erc'h a gwez a dorchadou
Ar goan zo kriz ha garo :
Ann tremeniad skuiz-maro
A zempl : klevit he hirvoudou :

Piou a red d'hen repui ?
Eur manac'h paour hag he gi.

Ann den a goll ar sklerijen
Hag a renk klask he vara,
Piou a gavo d'her rena
E kreiz ker braz tevalijen ?
Piou her bleino 'zor da zor
He gi, he vignon *Azor*.

Ar paour Lazar den reuzeudik,
N'en deuz na ti na bara,
Gand ann naon reudi a ra
Kichen dor ar falz-pinvidik.
Piou a lipo he c'houli ?
Teod Karantezuz ar c'hi.

Ar c'hi, red eo hel lavaret,
Ne ket servicher hep-ken,
Rag evit plijout d'ann den
E varfe kant gwech ma ve ret;
Kalon gwell n'ez euz hini,
Gwell eget kalon ar c'hi.

Ann Aotrou Alexandr,
Chalouni -
bet person eb Playben

N.B. { M^r de la Villemarqué a fait paraître
une pièce dans la Revue de l'Armorique
et de l'Ouest - en fév. 1844. - p. 16
- le Nouveau Tzig ha Breiz la reproduit
1904 p. 289.